

सप्तर्षि पूजा

(कविवर मनरंगलालजी)

छप्पय

प्रथम नाम श्रीमन्व दुतिय स्वरमन्व ऋषीश्वर ।
तीसर मुनि श्रीनिचय सर्वसुन्दर चौथो वर ॥
पंचम श्रीजयवान विनयलालस षष्ठम भनि ।
सप्तम जयमित्राख्य सर्व चारित्र-धाम गनि ॥
ये सातों चारण-ऋद्धि-धर, करूँ तास पद थापना ।
मैं पूजूं मन वचन काय करि, जो सुख चाहूँ आपना ॥

ॐ ह्रीं चारण ऋद्धिधर श्रीसप्त ऋषीश्वराः ! अत्र अवतर अवतर संवौषट्
आव्हाननम् ! ॐ ह्रीं चारण ऋद्धिधर श्रीसप्त ऋषीश्वराः ! अत्र तिष्ठ ठः ठः
स्थापनम् । ॐ ह्रीं चारण ऋद्धिधर श्री सप्त ऋषीश्वराः ! अत्र मम सन्निहितो
भव भव वषट् सन्निधीकरणम् ।

शुभ-तीर्थ-उद्भव-जल अनूपम, मिष्ट शीतल लायकें ।
भव-तृषा-कंद-निकंद-कारण, शुद्ध-घट भरवायकें ॥
मन्वादि चारण-ऋद्धि-धारक, मुनिनकी पूजा करूँ ।
ता करैं पातक हरे सारे, सकल आनंद विस्तरूँ ॥

ॐ ह्रीं श्रीचारण-ऋद्धिधर श्रीमन्व-स्वरमन्व-निचल-सर्वसुन्दर-
जयवान-विनयलालस-जयमित्रऋषिभ्यो जन्मजरामृत्युविनाशनाय जलं
निर्वपामीति स्वाहा ।

श्रीखंड कदली नंद के शर, मंद मंद घिसायकें ।
तस गंध प्रसरित दिग-दिगंतर, भर कटोरी लायकें ॥
मन्वादि चारण-ऋद्धि-धारक, मुनिनकी पूजा करूँ ।
ता करैं पातक हरे सारे, सकल आनंद विस्तरूँ ॥

ॐ ह्रीं श्रीमन्वादिसप्तर्षिभ्यः भवआतापविनाशनाय चंदन निर्वपामीति स्वाहा ॥

अति धवल अक्षत खंड-वर्जित, मिष्ट राजन भोग के ।
कलधौत-थारा भरत सुन्दर, चुनित शुभ उपयोग के ॥ मन्वादि..

ॐ ह्रीं श्रीमन्वादिसप्तर्षिभ्यो अक्षयपदप्राप्ताये अक्षतान् निर्वपामीति स्वाहा ॥

बहु-वर्ण सुवर्ण-सुमन आछे, अमल कमल गुलाब के ।
केतकी चंपा चारु मरुआ, चुने निज-कर चावके ॥
मन्वादि चारण-ऋद्धि-धारक, मुनिनकी पूजा करूँ ।
ता करें पातक हरे सारे, सकल आनंद विस्तरूँ ॥

ॐ ह्रीं श्रीमन्वादिसप्तर्षिभ्यः कामबाणविध्वंसनाय पुष्पं निर्वपामीति स्वाहा ॥
पकवान नानाभांति चातुर, रचित शुद्ध नये नये ।
सदमिष्ठ लाडू आदि भर बहु, पुरटके थारा लये ॥ मन्वादि...

ॐ ह्रीं श्रीमन्वादिसप्तर्षिभ्यः क्षुधारोगनिवारणाय नैवेद्यं निर्वपामीति स्वाहा ॥
कलधौत-दीपक जडित नाना, भरित गोघृत-सारसों ।
अति ज्वलितजगमग-ज्योति जाकी, तिमिर नाशनहारसों ॥ मन्वादि..

ॐ ह्रीं श्रीमन्वादिसप्तर्षिभ्यः मोहांधकारविनाशनाय दीपं निर्वपामीति स्वाहा ॥
दिक्-चक्र गंधित होत जाकर, धूप दश-अंगी कही ।
सो लाय मन-वच-कायशुद्ध, लगाय कर खेऊं सही ॥
मन्वादि चारण-ऋद्धि-धारक, मुनिनकी पूजा करूँ ।
ता करें पातक हरे सारे, सकल आनंद विस्तरूँ ॥

ॐ ह्रीं श्रीमन्वादिसप्तर्षिभ्यो अष्टकर्मदहनाय धूपं निर्वपामीति स्वाहा ॥
वर दाख खारक अमित प्यारे, मिष्ट चुष्ट चुनायकै ।
द्रावडी दाडिम चारु पुंगी, थाल भर भर लायकें ॥ मन्वादि..

ॐ ह्रीं श्रीमन्वादिसप्तर्षिभ्यः महामोक्षफल प्राप्ताय फलं निर्वपामीति स्वाहा ॥
जल गंध अक्षत पुष्प चरुवर, दीप धूप सु लावना ।
फल ललित आठों द्रव्य-मिश्रित, अर्घ कीजे पावना ॥ मन्वादि...

ॐ ह्रीं श्रीमन्वादिसप्तर्षिभ्यो अनर्घ्यपदप्राप्ताय अर्घ्यं निर्वपामीति स्वाहा ॥

(जाप ९ बार)

ॐ ह्रीं श्रीमन्वादिसप्तर्षिभ्यो नमः ।

जयमाला

वंदू ऋषिराजा धर्म-जहाजा निज-पर-काजा करत भले ।
करुणा के धारी गगन-विहारी दुख-अपहारी भरम दले ॥
काटत जम फंदा भवि-जन-वंदा करत अनंदा चरणन में ।
जो पूजें ध्यावें मंगल गावें फेर न आवें भव-वन में ॥ १ ॥

छन्द पद्धरी

जय श्रीमनु मुनिराजा महंत, त्रस-थावरकी रक्षा करंत ।
जय मिथ्या-तम-नाशक पतंग, करुणा-रस-पूरित अंग अंग ।
जय श्रीस्वरमनु अकलंकरूप, पद-सेव करत नित अमर भूप ।
जय पंच अक्ष जीते महान, तप तपत देह कंचन-समान ।
जय निचय सप्त तत्त्वार्थ भास, तप-रमातनों तनमें प्रकाश ।
जय विषय-रोध संबोध भान, परपरणति नाशन अचल ध्यान ।
जय जयहि सर्वसुन्दर दयाल, लखि इंद्रजालवत जगत-जाल ।
जय तृष्णाहारी रमण राम, निज परणतिमें पायो विराम ।
जय आनंदघन कल्याणरूप, कल्याण करत सबको अनुप ।
जय मद-नाशन जयवान देव, निरमद विचरत सब करतसेव ।
जय जयहिं विनयलालस अमान, सब शत्रु मित्र जानत समान ।
जय कृशित -काय तपके प्रभाव, छबि-छटा उड़ति आनंद-दाय ।
जयमित्र सकल जगके सुमित्र, अनगिनत अधम कीने पवित्र ।
जय चन्द्र-वदन राजीव-नैन, कबहुँ विकथा बोलत न बैन ।
जय सातों मुनिवर एक संग, नित गगन-गमन करते अभंग ।
जय आये मथुरा पुर मँझार, तहं मरी रोग को अति प्रचार ।
जय जय तिन चरणनिके प्रसाद, सबमरी देवकृत भई वाद ।
जय लोककरे निर्भय समस्त हम नमत सदा नित जोड हस्त ।
जय ग्रीष्म ऋतु पर्वत मँझार, नित करत अतापन योग सार ।
जय तृषा-परीषह करत जेर, कहुं रंच चलत नहि मन-सुमेर ।
जय मूल अठाइस गुणन धार, तप उग्र तपत आनंदकार ।
जय वर्षा-ऋतु में वृक्ष-तीर, तहँ अति शीतल झेलत समीर ।
जय शीत-काल चौपट मँझार, कै नदी-सरोवर-तट विचार ।

जय निवसत ध्यानारूढ होय, रंचकनहिं भटकत रोम कोय ।
जय मृतकासन वज्रासनीय, गोदूहन इत्यादिक गनीय ।
जय आसन नानाभाँति धार, उपसर्ग सहत ममता निवार ।
जय जपत तिहारो नाम कोय, लख पुत्र पौत्र कुल वृद्धि होय ।
जय भरे लक्ष अतिशय भंडार, दारिद्र्यतनो दुख होय छार ।
जय चोर अग्नि डाकिन पिशाच, अरु ईति भीति सब-नसत सांच ।
जय तुम सुमरत सुख लहत लोक, सुर असुर नमत पद देत धोक ।

छन्द रोला

ये सातों मुनिराज, महातप लक्ष्मी धारी ।
परम पूज्य पद धरैं, सकल जग के हितकारी ॥
जो मन वच तन शुद्ध, होय सेवै ओ ध्यावै ।
सो जन 'मनरंगलाल' अष्ट ऋद्धिनकाँ पावै ॥

दोहा

नमन करत चरनन परत, अहो गरीबनिवाज ।
पंच परावर्तननितैं, निरवारो ऋषिराज ॥

ओं ह्रीं श्री मन्वादिसप्तर्षिभ्यो जयमालासहित पूर्णार्घ्यं निर्वपामीति स्वाहा ॥

